

Parlamentario mr. Alexander Tromp, fraccion AVP:

Gobernador ningun momento a worde irrespetata di parti di fraccion di AVP

ORANJESTAD (AAN): Hopi ta e especulacionnan cu a worde crea den e ultimo simannan cu ta tras di lomba entornu e function di Gobernador: Cu asombro mi por a tuma nota di algun declaracionnan di nos adversarionan cu nos Gobernador no a worde trata cu e debido respect di parti di nos fraccion y cu no mester a mete Gobernador den e asunto di e tratamiento di e Ley di BBO.

Esaki a ponemi reflesha algun aña atras ora mi a termina mi estudio di derecho y mi a gradua como jurista riba e tesis cu tin como titulo: "e autoridad di Gobernador" (De bevoegdheid van de Gouverneur). Durante e periodo aki mi a haci diferente investigacionnan y estudionan entornu e function di Gobernador. No ta mi idea di bay splica esaki ampliamente pero si mi kier a trece cierto clarificacionnan riba dicho especulacionnan cu a worde treci padilanti entornu e function di Gobernador.

Gobernador ta eherce dos function: esun di Landsorgaan. Como representante di La Reina aki e ta forma hunto cu e ministernan nos Gobierno di Aruba. Esaki ta ancla den nos Staatsregeling di Aruba den articulo I di capitulo II. Esaki ta encera cu e ta forma parti di e poder Legislativo como ehecutivo di nos Trias politica. Di otro banda e ta eherce e function di Koninkrijksorgaan. Aki e no ta representa La Reina pero ta representante di Gobierno di Reino.

(Koninkrijksregering.) Berdad ta cu ta Gobierno di Aruba (minister cu a firma un Landsverordening of landsbesluit) ta esun cu ta para responsabel pa cu esaki aunque cu Gobernador a pone su firma tambe riba dicho documentonan.

Esaki ta encera cu en principio Gobernador ta obligado di firma un Landsverordening of Landsbesluit cu ta worde presenta door di Gobierno of Staten. Si tuma nota cu dicho

documentonan ta contra di deugdelijkheid van bestuur, rechtszekerheid, fundamentele rechten van de mens, verdragen of otro aspectonan cu ta worde menciona den nos Statuto, e ora ey Gobernador tin di pone su function como Landsorgaan un banda y eherce esun di Koninkrijksorgaan y no pone su firma riba dicho documentonan. Semper asunto di Reino tin prioridad riba esun di Landsorgaan.

E bevoegdheid (autoridad) di Gobernador como Landsorgaan ta masha limita y no mucho cla segun nos constitution (Staatsregeling van Aruba). E hecho cu Gobernador riba mayoria asuntunan simplemente ta worde presenta como un parti di Gobierno di Aruba, ta lanta e especulacion con hopi of con leeuw en realidad Gobernador por tin influencia riba e maneho di Gobierno.

Segun staatsrechtelijke theorie y literaturan ta stipula cu Gobernador den su relation cu Gobierno (ministernan) por duna su opinion personal, consehonan y tambe hasta advertencianan riba topiconan cu ta concerni maneho di Gobierno. Ki contenido concreto y influencia esaki lo por tin riba Gobierno, esaki ta reflesha riba e personalidad y postura di e persona cu ta eherce e function di Gobernador.

Den literaturan ta stipula cu ta acceptabel cu e function di Gobernador como representante di La Reina (Landsorgaan) ta eherce tres poder classico: pa adverti, pa conseha y pa worde consulta.

Tambe ta stipula cu ora un Pais ta para dilanti situacionnan unda cu mester tuma decisionnan dificil e ora ey Gobernador por invita representantenan di diferente organizashonnan (belangengroepen), politiconan veterano of juristanan constitucional pa asina intercambia ideanan cu su adversarionan riba e decision cu al final mester bay worde tuma.

Pero semper teniendo cuenta cu si asina mes keda un

desacuerdo riba e decision cu mester worde tuma entre Gobernador y un minister (Gobierno), e decision di e minister (Gobierno) ta esun decisivo. E functionnan aki menciona no ta stipula den nos constitution pero ta worde considera como constitution no skirbi (ongeschreven staatsrecht).

Tresiendo back padilanti lo sucedido algun siman atras, ora cu tres fraccion di oposicion den parlamento di Aruba (10 for di e 21 asientonan) a haci un peticion na Gobernador pa scucha nan opinion of asina yama banda di medalla, Gobernador sin mas y sin ningun splicacion a ignora e peticion aki door di no a duna oido na nan peticion y a tuma e decision di firma e Ley di BBO.

Ki a costa di invita e tres lidernan di fraccion den parlamento y asina scucha nan argumentonan? Al fin al cabo ta representantenan di nos pueblo nan ta.

Esey riba su mes no lo tabata un impedimento pa cu firmamento di dicho Ley si dado caso Gobernador haya cu e ley riba su mes ta justifica.

Manera cu mi a menciona caba cu e poder di Gobernador como Landsorgaan (representante di La Reina) ta masha limita mes, pero segun su function e tey pa entre otro worde consulta. Y ta pa esey e tres lidernan di fraccion a haci nan peticion.

Awor cu critica a worde lansa cu Gobernador no a duna oido na e peticion di e tres lidernan di fraccion den parlamento, esey sin mas no kiermeen di a insulta Gobernador! Nos ta biba den un democratische rechtstaat na unda nos tur por duna nos opinion libremente contal cu esaki no bay den ofensa.

Y simplemente cuestionando Gobernador di no a duna oido na e peticion di e tres lidernan di fraccion y tambe mirando tur e consehonan negativo cu a bini padilante entornu e Ley di BBO di diferente organizashonnan, institucionan constitucional etc., cual ta duna muestra di e peso di e peticion haci pa

worde scucha siquiera, no kiermeen cu Gobernador a worde insulta. Pero si mi ta di opinion cu un reaccion mester a tuma lugar di parti di Gobernador promer cu e a firma. Asina e a cumpli minimalmente cu e principio di un "deugdelijk procesgang" di "hoor en wederhoor".

Lamentablemente e no a haci esey y asina a crea un dual riba e objectividad cu cual e ta haci su trabao. Manera nos lider di fraccion mr. Mike Eman a bisa cu si na final e ta dicidi di implementa e Ley por medio di su firma nos tur mester accepta y respeta su decision, pasobra al fin al cabo esunnan cu ta para responsabel pa cu e Ley aki ta Gobierno y no Gobernador.

Pero a base di articulo 21 di e Reglamento di ordo pa Gobernador (Reglement van orde voor de Gouverneur) ta stipula cu Gobernador tin un tarea di sumo importancia, cual ta encera cu e mester "toets" un Landsverordening of Landsbesluit promer cu e pone su firma.

Den e caso aki tabata uno bisto cu tawatin duda riba e legalidad di e "totstandcoming" di e Ley BBO y Gobernador no a cana e proceso completo pa averigua e opinionnan riba esaki si esaki ta berdad of no, mirando cu no a duna audiencia na e lidernan di fraccion di oposicion den parlamento cu tambe a experencia kico a tuma lugar den parlamento 21 di december ultimo y a scucha un banda di medalla so.

E omission pa keda sin scucha esnan cu a pidie un audiencia ta laga un marca penoso y lamentable, mirando e hecho cu aki ta representantenan di parlamento a pidi dicho audiencia den nomber di pueblo.

Tambe e declaracion di

Gobernador na wereldomroep cu ora un peticion asina worde haci riba su persona, e ta considera esaki como "span voor een politiek caretje" ta un muestra di un interpretacion incorrecto di e articulo cu ya mi a menciona, esta e articulo 21 di e Reglement van orde voor de Gouverneur cu ta duna Gobernador un tarea hopi importante mes den nos sistema constitucional. Ignorando e articulo aki of cu no por haci un apelacion riba e articulo aki ta reduci e function di Gobernador na un "lintjesknipper".

Esey no ta e intencion pa cual nos ta haya un Gobernador. Un posicion asina importante den nos sistema di "checks and balances" constitucional.

Mi ta di opinion cu nos lider di fraccion, mr. Mike Eman a cana e caminda correcto di bay Gobernador y tabata hopi respetuoso pa cu Gobernador hasta despues di e lamentable forma di proceder di Gobernador. Poco ta e lidernan di un partido den oposicion cu den pasado y actual a y lo duna un sosten na nombracion di un persona asina directamente for di arena politico di un partido contrincante pa bay eherce un di e funcionnan mas halto segun nos constitution, esta e function di Gobernador.

Promer cu mi finalisa un hecho mester keda bon cla: Aunque tin ora tin diferenciacionnan di opinion unda cu nos ta expresa nos pensamentonan a base di derechonan adkiri por medio di nos constitution, semper Gobierno, nos di parlamento y pueblo di Aruba en general mester sigui duna nos Gobernador e debido respect y honor, ya cu den practica ta existi hopi staatsmanschap di Gobernador pa pone su dos funcionnan den un solo function.

TELEFONAN DI DIARIO
582-6747- FAX 582-8551